

南
粲
吟



線
851.486
8568-4

南漿吟

民國十三年甲子作

大埔

羅卓英

慈威

甲子南遊雜詠絕句百首

七尺猶餘自在身。北蹄南槳閱星辰。黃塵萬斛濤千頃。

笑問掀天揭地人。

北馬嘶風南船載雨
黃塵碧海當笑勞人

天地綱維一柱尊。人間甲子又逢元。初生爲汝張弧矢。

擾擾神州望虎賁。

新歲獲男
錫名中郎

一睨人才恥輩流。此行豈爲稻粱謀。故園莫負栽花約。

桃李成陰笑語稠。

茲行赴南洋係
爲中學募款

行篋蕭然筆一枝。船山詩卷却相隨。乍逢世路生荆棘。

翻似連雲出棧時。全國擾攘粵局尤紊處處有行路難之歎

人如驚鳥失寒林。路有豺狼起戒心。鷄犬無聲村市寂。

入山猶恐不山深。某部久踞潮梅橫暴極矣可恨

處處峯迴水復灣。一花一草亦開顏。舟行三日了無事。

醉便高歌飽閱山。韓江舟中

教可化民人豈易。文能驅鱷事殊難。誠心公道存天地。

千載江山遂姓韓。韓江韓山均以唐韓愈刺潮州而得名其祭鱷魚文亦頗怪趣

海走江翻撼夏秋。流沙瀼瀼壓城頭。隄防一線焉能恃。

欲免其魚仗老謀。潮州城昔驚海嘯今患江洪可慮也

851,486
8568-4

鮀江形勝扼咽喉。謀食人爭破浪遊。但得通關浮海去。

不辭牛馬走荒陬。

粵閩同胞經汕頭往南洋謀生者歲恒逾萬人關禁苛擾民甚苦之

橫空一雁俯秋塵。籍甚聲華憶丙辰。收拾雄心消戰壘。

征衫拋却作才人。

何海鳴將軍曾主汕某報筆政署名一雁

老猶不減少年狂。酒陣詩壇白戰忙。幾輩驚心黃種賤。

奇才先覺競圖強。

吾鄉李谷僧先生清末宦遊東北遍歷三韓才氣縱橫識見高遠曾上書日本首相伊藤博文縱論

黃人團結及東亞自強之策伊氏驚奇晚年羈棲汕市豪放猶昔蓋今世有心人也

吾師風義最矜嚴。苦口忠言俗可砭。欲濟羣生公竟渡。

矢從人海挽波活。

林師諱濟羣號謬庵思想明銳言文犀利與錢師熱儲同主汕頭平報筆政署名利病甚負時譽不

幸前年秋慘溺韓江輪中余時奉錢師命來館繼其職務實兢兢焉



無冕平凡一後生。筆花生處意縱橫。眼前種種皆憂患。

欲替人間寫不平。前年任職平報是為華人之始

風致天然是大家。瓊枝略似海棠斜。八年往事匆匆過。

猛憶芙蓉影裏花。客邸餞春餘情難遣

獨携身世感紅妝。人有奇才劍有光。珍重好風須護惜。

一帆飛渡太平洋。惜別情深送行語擊天風人海壯我前程

七洲洋裏有長沙。儼列礁峯若齒牙。猶是中邦舊領海。

多情靈鳥伴星槎。七洲洋在海南島之東南有長沙石塘等礁舟行宜慎相傳船過洋中時輒有箭鳥飛來引導

龍性由來未肯馴。那能滄海久沉淪。待他恩怨分明日。

會向雲間露巨鱗。海上述懷

微茫交趾亦雄區。原是支那舊版圖。百戰到頭終易主。

河山風景未全殊。

船過越南海面
隱約可見西貢

圖南遠志幾人同。滄海樓船氣更雄。他日重洋看洗甲。

和平鼓吹自由風。

船行大洋雄濶無垠喜
與映薇談心各有經綸

方外投荒一忍持。未諳蠻語轉艱危。狂奴畢竟心全死。

擊鉢無端作碎卮。

四川和尙受同船客
之辱飯碗亦被碎矣

未必輪迴六道真。豈期猪仔現今身。茫茫人獸關何在。

造物原來便不仁。

昔年沿海同胞常被桀黠之徒誘赴南洋騙作
苦工稱為賣猪仔慘無人道今則此風漸戢矣

迷離禹跡欲何之。浩浩天風日夜吹。縱有冤禽銜不盡。

愚公到此亦無爲。

遠洋浩瀚
孤舟一葉

飛來一語最驚心。有客天花閱歷深。禍福卽今成共濟。

不妨嘗試買黃金。船中兩客患病有倡議
集金向關員試賄者

入港宵行夜色迷。遙看百里艷燈隄。海天忽湧通明市。

燭怪何煩溫嶠犀。船抵星加坡港
夜望星洲喜甚

黃金無準佛無憑。彼岸分明未許登。千二百人都不語。

剎那山上怒騰騰。試賄不成乘客均被送往星加坡
對岸剎那山和尚亦不能免可笑

等似幽囚欲問天。如何三宿竟三遷。縱云消劫恒河水。

白種紅毛豈亦仙。當局對同船諸色人種及器物均
施消毒工作獨不見白種人可恨

自由港並峙東方。此地樞機握兩洋。兵戰何如商戰劇。

百年經濟逞雄強。香港星加坡均為自由港英國自一八二四年
購得星島後築港關埠不遺餘力今剛屆百年

橡樹燃脂制作豐。錫砂開發蘊無窮。山皮地骨都饒富。

人力爭天實惠工。

馬來半島物產極豐。橡皮錫礦實居首位。

長思人類安全計。夙抱衆生平等觀。棘地荆天知悔否。

好憑心力克艱難。

參觀各地教堂佛刹及學校會館等有感。

玩波亭上望秋潮。生活炎州夜色饒。到此似開人種會。

奇聲怪色却難描。

馬來亞民族複雜向有世界人種博覽會之稱星洲公園夜景尤奇。

此來不見黃公度。國弱民愚兩可憐。椰雨蕉風生命賤。

保僑無力愧前賢。

黃遵憲字公度粵梅縣人曾任星加坡總領事聲譽甚著。

開國功侔華盛頓。倡民權似法盧梭。三民主義煌煌訓。

康樂民生惠最多。

孫中山先生創業偉大三民主義尤廣博精深。

樽俎平生善折衝。蜚聲國際見恢容。豈無淨土慈悲度。

自有靈臺博愛宗。老外交家伍秩庸博士廷芳憂憤國事歿於廣州遺囑火葬博士為基督徒精研世界靈學旁參佛

老喜幽默善攝生自謂壽可逾百齡

崢嶸年少艷才華。脫手文章隘百家。舉世昏狂天亦憐。

金戈紅粉咽秋笳。史學家兼政論家梁任公先生啓超遊南洋時得某女士愛慕自謂為奔走國事中之艷遇曾讀其

本事詩又任公述懷詩有十年以後當思我學國猶狂欲語誰之句

先哲微言示大同。只今天下亦為公。何須伐異爭牛李。

相忍相成國運隆。海外黨爭亦如國內報紙亦然

善賈翻為教育家。天南學府此堪誇。今朝濟濟看多士。

有意種瓜便得瓜。陳嘉庚輸財興學譽滿中外余曾參加華僑中學畢業禮且有演說

二老登高振臂呼。八方響應競捐輸。萬川子弟多英俊。

共為粉鄉樹遠圖。

建校募款由藍晉臣劉登鼎二先生領導踴躍認捐進行順利

桑梓敬恭不敢忘。皇皇客館署茶陽。人才畢竟關榮悴。

又聽弦歌起講堂。

星洲茶陽會館歷史頗久嗣創辦啓發學校就館地展築規模日宏

鄉黨高名媿仲弓。却來員嶠作壺公。早知末世文章賤。

盧鵲真同良相功。

同里陳芷馨先生富文才具德望清末來星洲懸壺濟世人甚重之

少年頗媿竊虛聲。海外人師暗自驚。今日幸瞻新氣象。

菁莪郁郁話前程。

啓發學校頗著時譽年前有電聘余長校余正在鄉整頓教育婉謝未應不期今來適寓該校獲與

員生樂數晨夕亦夙緣也

移山填海願無窮。終信人工奪鬼工。排盡風濤開坦道。

居然天塹軌能通。

柔佛海峽填堤築路積年成功時適舉行通車典禮

似聽牛郎織女吟。相思淚比海還深。橋成烏鵲功無際。

携手從今共一心。

海峽堤橋定時開閉甚為壯觀余於乞巧前夕乘車過海北遊

野番柔佛昔稱兵。列木編茅認故城。遙想鄭和當日事。

中華會此著威聲。

明史載柔佛小國其酋好構兵覆茅列木有城與池其民無事通商有事則服兵役儼然強國也鄭

和下南洋會服其地

寶藏久揭尚蠶叢。新建巖疆號吉隆。今日停驂來訪舊。

從頭細數主人翁。

至吉隆埠訪何心谷兄為言此方掌故及廢興之迹頗詳

拓荒窮海與天爭。多半當時子弟兵。敗亦光榮繁漢裔。

至今艷說葉來城。

清末粵民葉來往南洋初為礦工後率眾擊敗土民據有吉隆一帶礦場稱雄一時嗣為英人所奪

大伯公來問所司。僑民到處有崇祠。二千年史都搜遍。

其事其人我未知。華僑到處有大伯公廟但未詳其來歷也

海外萍蓬亦夙緣。深談淺笑各纏綿。篋中賸有西青記。

淡月涼雲寫玉娟。同車程女士宜與人清談娓娓相印心心另有小詞紀之

選勝西行到海心。檳榔嶼上訪知音。少年便作奇男子。

力抗秦庭義足欽。至檳榔嶼訪鍾樂臣兄鍾曾充華人代表赴倫敦抗議英國殖民地政策

太守風流舞袖寬。黃金買得小嬈鬟。洞天深處文星聚。

應有仙姬下廣寒。吾邑僑領戴芷汀先生招宴檳城俱樂部先生清末汀州知府

諸天草木落閒庭。花葉書成字字馨。萬一報恩容我住。

澄心佛火照青冥。訪檳城極樂寺

夢裏河山無說處。眼中風雨欲來時。維新志士都亡命。

鏤骨難忘故國思。

極樂寺岩壁大刻康有爲勿忘故國四字余水龍吟詞有雲飛海外神遊故國多情公子風雨欲來

江湖未老還他名士等句

疎星無力黯銀河。北望中原戰伐多。何日干戈化玉帛。

風梳雨洗見清和。

中元節書感

雄心誰與唱刀環。天悔人憐付等閒。別有風懷忘不得。

奇情我亦似船山。

讀船山詩頗著魔矣少年意緒亦堪哂耳

丁年草草作勞人。孰是金剛百鍊身。但祝椿萱慈愛永。

高堂捧日貯長春。

由檳城渡海沿馬來半島北遊暹羅轄境忽生去國思親之感

手足睽離十五年。縈思如夢意拳拳。今朝海角相逢處。

瑣語連宵不忍眠。

至暹屬某埠訪二哥星槎五弟偉民傾談三日始別

劬勞何日報春暉。忍淚傳言願詎違。萬里思兒傷積痍。

宵衣望汝寄將歸。

吾母寄語二哥遠遊久隔倘不能歸盼製貼衣藉解渴念至哉親心

花萼樓還倚竹林。天涯骨肉話情深。人生意氣如雲盛。

前路功名若可尋。

又訪謁三叔及晤姪輩承叔父勉赴前程至深感奮

風波萬里繫靈槎。雛燕分飛各有家。一事兒時成猛憶。

夕陽屋角擷籬花。

同胞征姊濃妹潔妹先後隨夫南遊余茲來亦參商遠隔無從晤面

小樓四面淡紅墻。眼底山城斗一方。此事令人真笑煞。

區區酋長亦稱王。

述暹羅屬某埠所見

探險家言字字真。殊方異俗訝奇新。山行窮谷求仙藥。

只見頭顱不見人。

南島採藥神話亦黃公度詩飛蠱民頭落迎貓鬼眼瞋一類故事耳

遂然林谷見巢居。到此偏疑返太初。鳥獸同羣渾未覺。

那知天演有乘除。

車行所見感慨系之

紅衣雨過浴新妝。綠蓋風生受晚涼。乞得好花和好葉。

爲君親製紫荷囊。

題畫荷花

夢中詞客亦荒唐。錯認西湖是故鄉。要使定公輸一著。

今生便作水仙王。

題畫水仙

中華孝子與慈孫。足遍全球生聚繁。祇欠十年教訓法。

南風一競振黃魂。

海外華僑數逾千萬南洋實爲主要地區

披星戴月犯風濤。閩粵先民各建旄。今日旌旗當北指。

同心革命望吾曹。

早期華僑在南洋據地稱雄者頗多惜為後來英荷勢力所覆耳孫中山先生倡導革命推倒滿清

建立民國得華僑助力最多嘗稱華僑為革命之母

樓船控海開新紀。擴地殖民逞霸圖。獨有芸芸華夏裔。

任人牛馬犬豚呼。

南洋群島雖為白種人爭霸之場而筆路開發實我華僑汗血之功

無國無家賸一身。翻飛困翮躍枯鱗。櫛風沐雨年年慣。

換得人間異域春。

昔年赴南洋群島之華僑多係在家貧困無聊或因事不容於鄉里之人浮海遠適甘為苦力厥後

地利日闢往者日衆執業亦廣間有致富成家安居不返者矣

雖無舜日堯天戴。却有唐風漢俗傳。重九茱萸重五艾。

迎年吉語寫紅箋。

華僑在海外不獲政府保護形同無國籍之人但因勤勞儉樸人口繁殖到處蔚成村市歲時風俗

與中土無異新年春聯雖海角山陬亦輝楣映室彷彿遊乎祖國河山也

共指謀生好食場。親朋兒女走番鄉。一年六節成癡望。

水客歸來喜欲狂。近世紀來閩粵人民競向南洋謀生有專事帶函
滙款為業者名為水客吾鄉每年往來六次家庭

生活農村經
濟均利賴之

秋老方嗟雁不歸。春來又放燕南飛。此心自笑成矛盾。

無奈謀生計漸非。僑胞主婦多留鄉持家務
兒稍讀書便飭遠出謀生

而今不羨金龜婿。比翼何如番客佳。但願腰纏十萬貫。

嫁鷄嫁狗亦甘偕。內地婦女受生活壓迫多願嫁番客
有不問年貌竟隨水客前往就婚者

去國都因臣朔飢。還鄉番客被凌欺。何當舉室携南渡。

若問歸期未有期。內地稱華僑為番客華僑還鄉被地方惡霸欺
壓憤而舉家外遷者頗多甚望有司亟起糾正

數典堪憐半腦沙。馬留大叔漫相誇。茫茫應醒春婆夢。

錯把紅毛喚祖家。

華僑娶馬來婦所生混種稱半腦沙馬來種亦稱馬留種謂馬援留裔也土婦稱初至華僑為唐山

大叔又白人殖民政府稱其本國為祖家土人及華僑亦從而呼之可恥可憐

莫以天時詈熱昏。應從地利覓生存。勞筋苦志尋常事。

心力拋餘上帝尊。

土人渾懶多以樹實果腹吳語熱昏二字此其證矣

治人受治非天賦。全仗先知覺後知。靈鑰開時真諦出。

衆生平等佛無悲。

南洋群島土人多佞佛須從教育文化入手喚醒之

黑白櫻黃種色殊。豈因貴賤判賢愚。倘從教化開風氣。

智力平頭階級無。

蔣百里先生曾云現代種族優劣與國家強弱之比較若武力經濟等落後尚非可恥之事獨智識

及科學落後則真可恥亦復可憐今在廣大殖民地中尤堪例證與儆醒

太平洋上盪風雲。地坼天崩海水奔。若返冤親平等路。

大同篇揭自由魂。民族思潮高漲人類智慧開通日激月盪終獲自由必進大同

縱然人妒也何妨。時輩由他去較量。畢竟船山饒卓識。

奇才遭罵只尋常。與映薇夜話孤憤填膺却借船山詩意以解之

疎疎雨似思卿淚。惘惘詞真攪我腸。忽見白蘋南浦月。

教人怎不戀空桑。蘋南訊至乃訪碧梨人語長橋燈昏冷月事足紀也書來送別堅約後期意可感也余復函有他日

倘見紅雲一片化為疎雨便是不佞海上相思淚也之句情堪味也

六年前事繫人思。日下豪情一逞詞。萬感蒼茫渾未覺。

海天雲湧立多時。海濱散步遐想萬千京國交遊都成回憶

西風高掛北征圖。雁入遙空影不孤。一笑憑君須記取。

明朝狂草落江湖。話別星洲諸友北返

日日奔波作水嬉。浮沉百態炫談奇。蛙身鷹眼迫腥臭。

苦笑迎人爲療飢。

詠水上乞兒生活
星洲輪埠所見也

佳節遙看把盞斟。十分圓潔掛天心。今宵祇汝爲良友。

風度汪洋試豁吟。

海上
中秋

郊壘排雲驚客夢。樓船蔽海撼余心。大鵬搏得扶搖勢。

終見高飛返故林。

香港寓感九龍半島即大鵬山
餘脈英再拓展租借地稱新界

宋王過此台生色。王去台荒弔宋亡。六百年間多變局。

傷心海水又飛揚。

九龍宋王台亦稱宋亡台
今日豈獨宋亡已耶傷哉

五丁鑿壁破鴻濛。棧谷梯山萬仞通。米字大旗迎旭日。

竭來誰是主人翁。

在港乘纜車登山至太平頂遊覽俗稱升旗山

海市喧囂萬丈埃。征輪一夜渡江隈。夢中故國渾無異。

偏道人從域外回。

由港乘夜輪入省翌晨抵羊城海關稽禁甚嚴

名山盤勃勢雄奇。五嶺南來挺一支。暢海通江開世運。

文明風氣喜乘時。

百粵封圻向為南方重鎮近代思潮及文化多由此輸入孕發

抱海連山孕壯猷。凌煙傑閣峙南州。眼前憂樂關天下。

莫弔降王且擁貅。

粵秀山鎮海樓為越王臺舊址劉禹錫詩云忽擁貔貅鎮粵城

羊城寄跡亦粉鄉。佳日登高意欲翔。却比梁公親舍近。

白雲橫嶺自悠揚。

遊白雲山

浮海明珠炫眼開。波心湧出小蓬萊。神仙幾見揚塵劫。

換得元戎劍氣回。

海珠昔為佛寺後建礮臺今作海軍公園鑄有程璧光將軍像

臣佗當日霸圖空。王業今朝有聖雄。歷史翻新須革命。

東南民氣已蓬蓬。

由海珠渡海訪大元帥府

北鳥驚飛失故巢。南風吹湧海門蛟。天時人事看相應。

心力從今不枉拋。

黃埔軍校成立全國熱血青年投入革命熔爐北京政府早失人心矣

青山欲盡勢猶雄。入海驚濤嘯曉風。猛虎扃關寧恃險。

星稀月缺控長弓。

船出虎門情景神會

遙天一綫近家山。也學成連出海還。舊壘參差高下認。

潮來誰為濟時艱。

船近汕頭港將入馬士口

歸日沿溪秋色新。兩山夾處石嶙峋。浪花飛起爭迎客。

一笑吾還是主人。

舟抵梅潭登岸步行

長河曲注繞村隈。大好湖山入望來。五百年間形勝地。

應生名世濟時才。

入河頭村襟懷豁然

瀛海歸來造士林。郊迎父老倍關心。捐囊慷慨成功易。

勝似兵家報捷音。

還鄉報導大家喜悅國內募款得觀摩矣

五虎山連氣勢雄。龍潭淵躍起英風。他年廣廈千間竣。

東箭南金作育工。

擇地建校卜早觀成

去國光陰若逝波。蠻方花草問如何。閒情笑對山妻說。

已負蟾圓五度多。

還家記趣

東南太平洋舟中感懷示映薇

劍外孤星不可攀。昨宵親見斗牛寒。漸生華髮容何濟。

欲買青山到此難。入夢似嫌知己少。澆愁差覺酒杯寬。
天風浩浩無朝暮。俯仰乾坤一倚欄。
樓船破浪視眈眈。風度淵深得海涵。無地尙能容我住。
有珠莫更仗人探。壯懷擊楫天何醉。狂膽吞胡夢未酣。
心事爲君輕一擲。將軍從此欲圖南。

3652830



小華圖籍
 音聲莫與
 謝器如題
 天風書齋
 新貴青山
 入楚以
 圖南
 玉蘭
 容與
 共

中華民國
 三年
 拾貳月
 廿貳日
 購買



國家圖書館



004651775

